


© C.E.R.S. - B.P. 1673 Kananga
République Démocratique Du Congo
Email: 33eme.cers.lit@gmail.com

<http://www.33eme-cers.org/>



Yesu Udi Ubikila Muana Mukese

Bayidi bakalua kudi Yesu, bakamuebeja ne, Mu bukelenge bua mu diulu udi mutambe bakuabo nganyi? Yeye wakabikila muana mukese, wakamuteka munkatshi muabo, wakamba ne, Belulela, ndi nuambila ne, Binuikala kanuyi nukudimuna mitshima yenu, binuikala kanuyi nulua bu bana bakese, kanuena nubuela mu bukelenge bua mu diulu bulelela.

Wadipuekesha bu muana ewu mukese, yeye udi mutambe bakuabo mu bukelenge bua mu diulu. Witabuja muana mukese nunku mu dina dianyi udi ungatabuja meme; kadi bialenduisha muntu umue wabo wa mu bantu aba bapuekele bad! bangitabuja, biakadi bimpe kumusuka dibue dinene dia kupela nadi mu nshingu muende, kumuina mu bunene bua may! manene. Nudimuke, kanulenguludi muana umue wa mu bana aba bakese; ndi nuambila ne, Mu diulu matuku onso banjelo babo batu batangila Tatu wanyi udi mu diulu ku mesu.

(Matayo 18:1-6,10)

Yesu Udi Ukeba Tshidi Tshijimine

Mukelenge Yesu wakamba ne, Muana wa muntu wakuluila bua kusungila tshidi tshijimine. Nudi nuelangana meji a tshinyi? Bikala muntu ne lukama lua mikoko, pajimina mukuabo, yeye kena ushiya minga makumi tshitema ne tshitema, kena uya mu mikuna bua kukebeye udi mupambuke, anyi? Biaumoneye, bulelela, ndi nuambila ne, Disanka diende kudi wakadi mupambuke neditambe disanka diende kudi makumi tshitema ne tshitema yakadi kayi mipambuke. Nunku Tatu wenu wa mu diulu kena musue muana umue wa mu bana aba bakese afue.

(Matayo 18:11-14)

Mukanda wa Nzambi udi wamba ne, Buonso buetu tuakupambuka bu mikoko, tuakukudimuka bua kuya muntu wende njila muntu wende njila; Yehowa wakuteka dipila dia bubi bua buonso buetu pambidi pende.

(Yeshaya 53:6)

Bualu bua Nzambi wakatamba kusua ba pa buloba, yeye wakabapa Muanende umuepele mulela bua muntu yonso wamuitabuja kafu biende, kadi ikale ne muoyo wa tshiendelele.

(Yone 3:16)

Bia Kudia Bikese bia Nsongalume Bidi bia Bungi Mu Bianza bia Yesu

Kupita kua Yehowa, disanka dia Bena Yuda, kuakadi pabuipi. Yesu wakabanduluka, wakamona bantu ba bungi balua kudiye, wakakonka Filipino ne, Netusumbe mitanda ya bidia kudi kunyi, bantu aba badie? Wakamukonka nunku bua kumuteta munda, bua yeye wakadi mumanye bualu buakadiye pa kuenza.

Filipo wakamuandamuna ne, Bidia bia mushinga wa ndenalio (biamu bia argent bu makuta a bantu ba kale) nkama ibidi kabiena bibakumbana bua muntu ne muntu kuangata anu bikese. Muyidi wende mukuabo, Andele, muanabo ne Simona Petelo, wakamuambila ne, Nsongalume mukese udi apa, udi ne mitanda itanu ya bidia bia seola (bintu bidi bifuana mponda) ne mishipa ibidi; kadi bintu ebi ntshinyi tshienzelabi bantu bungi nunku?

Yesu wakamba ne, Shikamishayi bantu. Mashinde a bungi akadipu. Nunku balume bakashikama, bakadi bu binunu bitanu. Yesu wakamema mitanda; pakatendeleleye Nzambi, wakayabanyina bakadi bashikame, ne mishipa kabidi bungi buakadibo basue.

Pakuukutabo, wakambila bayidi ne, Angulayi bipesa bia bidia bidi bishale, tshintu katshijiminyi. Bakabiangula nunku, bakuuja bisaka dikumi ne bibidi tente ne bipesa bia mitanda itanu ya bidia bia seola biakadibo bashiya kudi bakadia.

(Yone 6:4-13)

Mukelenge Yesu wakamba ne, Ndi bianyi bidia bia muoyo; walua kundi kena wikala ne nzala, wangitabuja kena wikala ne nyoto. Bonso badi Tatu umpa nebalue kundi; tshiena ngipata walua kundi.

(Yone 6:35, 37)

Uvuluke Mufuki Webe

Uvuluke Mufuki webe mu matuku a bunsongalume buebe, padi matuku mabi kaayi manze kulua anyi bidimu kabiya bianze kufika pabuipi, paudi wamba ne, Tshiena nabi disanka. Ditshina dia Yehowa ntshibangidilu tshia lungenyi. Kutshina Yehowa nkuikala ne malu mabi lukuna. Ditshina dia Yehowa didi dilombola muntu ku muoyo; udi nadi neashikame talalaa, dikenga kadiena dimukuata.

(Muambi 12:1. Nsumuinu 1:7. 8:13. 19:23)

Mukelenge Yesu wakamba ne, Bulelela, bulelela, ndi nuambila ne, Umvua diyi dianyi, witabuja wakuntuma, udi ne muoyo wa tshiendelele, kena ulua ku tshilumbu, wakumuka mu lufu, wakubuela mu muoyo.

(Yone 5:24)